

醫學達變內編

笑軒
署僉

醫學達變序

嘗觀古聖之作易也。由奇偶對待。以成兩儀四象八卦。復錯綜其數。而爲周天卦數。萬有一千五百二十策。以包括萬事萬物之理。如地載天覆。無所遺佚。此無他。惟善於通變化裁而已。推之於醫學。亦何莫不然。夫醫者意也。以其意泛應百病。而每一病證。又有因地因時因人。及其內外標本虛實新舊之不同。斯非善通權達變化裁盡致。固不能精研極深之病機也。生甫張君。慈谿名士。素抱濟世才猷。而仕途坎坷。經綸莫展。遂解組還里。肆志醫學。醫學固其所素習也。於斯藉醫學救世。以酬其利物濟人之素志。全活一方。以億萬計。復出其心得。著爲成書。向者曾著虛勞要旨。已風

行海內。家置一編。近又著醫學達變。約五萬餘言。大旨分兩種。一著一述。洞徹病機之萬變。而疏方施治。曲盡其妙。名之曰達變。洵可爲名實相符矣。中庸曰。動則變。變則化。張君之心。蓋純乎化機流行。是以應病機之萬變而不窮也。由斯知醫界之讀其書者。必能淪其靈明。增其智慧。通變化裁。活活潑潑地。其有益於醫界者。何其弘哉。

民國十有三年季冬中旬壽甫張錫純敬序於滄州立達醫院


緒論

寒暑變而成春秋。日月變而成晝夜。生土質變而成老少。養炭氣變而成呼吸。凡蟻附於地球上者。無一年一月一日一時一分一秒有不變之勢。而最不知變。最不欲變。必迫於天時人事。環境潮流。驅之使不得不變者。實惟中國之人。乃一變而之船炮。再變而之工藝。三變而之學術。四變而之政治。今且駸駸乎及醫界矣。中國科學之程度。以醫界爲最低。中外衝突之潮流。以醫界爲最後。而革新之希望。亦以醫界爲最難。以改革醫界之時期而論。猶前清咸同朝之工藝。甲午前之學術。戊成年之政治也。雖有一二熱心早智之士。窮千里目。運廣長舌。曉音瘖口。昌言改革。而反對之

派。尙居多數。挾食古不化。一成不變之執見。故步自封。苟安簡陋。豈知事有古守其常。而今窮其變者。法家例。醫家術。其是已。夫事物變無窮也。有其備之。變更出所備外。故變無窮。窮其變者有窮。變無窮。窮其變者當與爲無窮。自非挾百試之才。享神明之壽。多其閱歷。神其穎悟。鮮有能相劑相守。以窮無窮之變者。故能如張君壽甫之衷中參西。張子壽頤之推陳出新。違古而適合乎古。食古而不泥乎古。時或拾古之遺。糾古之失。補古之闕。釋古之疑。已爲難能而可貴。今生甫張君。慈谿名士。年逾花甲。與嚴君癡孫。數十年同志爛書。本通變之宏才。著達變之醫學。溫古知新。通今博古。化裁盡致。闡發靡遺。是能窮其變。而又善自變之達醫也。足與

張君壽甫。張子壽頤。鼎足而成三達之名流矣。

中華民國十四年春月印巖何廉臣敬序於越州臥龍山麓之宣
化坊



序

自古立法之多。未有如醫學者也。卽以寒熱虛實四者論。參伍錯綜。變化無極。以藐然有涯之心。應疾病無涯之變。苟無學說。鮮有不殺人者。故以良相與良醫並稱。僅言其救人之功。而病變之多。惟將兵凶戰危。始可擬之。蓋兵刃既接。計略百出。瞬息萬變。爲將帥而無知彼知己之明。鮮不喪師失地。爲醫必熟曉治法。始可臨證不僨。夫法者。所以處變也。傷寒古有三百九十七法。一百一十三方。雜病治法。汗於載籍者。多至不可紀述。固可見變證之多。而且無盡矣。余於海內神交。輒要其著經驗心得之書。以垂達變之例。於學者語以多記前賢發明。以應萬病之變。是以素不喜派別。

門戶之爭。因文字可專宗一家。獨成一派。而醫病關於性命。與良相身繫天下安危同。苟拘執一派。則如房琯車戰。趙括讀書。害無底止。所謂立法者。即歷代相傳之醫籍。與近今之著作。在古如內難本經傷寒金匱。五者爲醫家大經大法。開創醫宗。化裁以御變。而後世發明經驗之法。如晉隋唐宋諸名賢。及金元劉張李朱。明清孫王喻葉薛以下諸家。立言各有發明。究不無偏溫偏清。偏攻偏補。偏香燥。偏滋黏。偏輕清。均宜博參融會。窮變以匯其通。近張壽甫何廉臣陸晉笙劉蔚楚裘吉生諸公。均主是說。劉君著一國醫宜融會各家。不偏一派論略。又著一中醫學說。有本末先後之解釋。或綜叙統系。指陳得失。或案斷該核。顛撲不磨。洋洋千餘言。

文義兼精。有功於世。深喜吾道不孤。乃者慈豁張君生甫。本其平生心得。有醫學達變之作。得我心所同然。曲踴三百。張君前著虛勞要旨。久已風行海內。斯編一出。定知洛陽紙貴。爰本張君之意而告之曰。法雖無窮。而其爲道則一也。道德經云。天得一以清。地得一以甯。神得一以靈。谷得一以盈。萬物得一以生。書云。惟精惟一。允執厥中。故法所以處變。而道所以統一。猶良相治國。法雖多。必歸本於仁義。執簡以御繁。識多以處變。庶不犯葉氏以藥餌爲刀刃殺人之誡。而擬於良相之宏濟也夫。

民國第一甲子孟冬月無錫周鎮小農別署伯華謹序

以國第一甲子所奉其無疆國事小順則齊國有餘
 八代國人其地而然以國之公而為之
 而本公之

序

治病難。用藥更難。治病之難。難在變。用藥之難。亦難在變。雖然。病之變也。固難治。而用藥欲隨病之變而變。豈非難之又難乎。或曰。醫學流傳已歷四千餘年。聖賢輩出。代有名著。苟執古方以療今病。豈不綽乎有裕哉。余曰。唯唯否否。不然也。試觀古昔醫賢如張李劉朱四大家。猶各自一說。偏執一見。若據千古不易之成方。應千變無定之奇症。其不殺人者幾希矣。昔呂子有言。良醫病萬變。治亦萬變。是則以變應變。此其所以爲良醫也。慈谿張生甫先生。醫學精邃。經驗宏富。目擊時醫之固執成方而不化。是以有醫學達變之作。清夜警鐘。覺彼迷者。今當付梓有日。聊誌數言弁其首。

若曰序。則吾豈敢。

民國第一甲子冬至後三日無錫友笙丁士鏞敬撰

緒言

張君生甫著書既成。徵序於余。余受而讀之。知其書分內外兩編。內編發揮醫理。獨擅精意。外編纂輯經論。擇尤列入。著也述也。朗若列眉。署其名曰醫學達變。夫達變云者。不拘守常法也。天下事有常必有變。處事者宜達不宜拘。醫學亦然。苟徒守常法。不知通變。生死反掌。所關豈鮮。張君胸具淵博之學。目放巨大之光。平日間凡醫籍。上自靈素。下逮百家。罔不博覽。變通化裁。出以精意。發揮盡致。以成斯編。其用心可謂摯焉。雖醫理高深。病變無窮。張君此著。雖未盡醫學之變。然神而明之。存乎其人。學者苟能得此著而引伸之。要可觸類旁通。妙義環生。左右逢源矣。一隅三反。聖言

良不誣也。乃舉世醫家者流。墨守者多。崇仲景之學者。動則辛溫發表。寒涼競投。宗葉吳之派者。動則辛涼透解。芳香開達。讀金元四大家之書者。各是其是。拘一定之方。應千變之病。不以病立法。而以方合病。莫知變通。可勝浩歎。此張君所以耿耿此著。以救世急。其性道實學一卷。宗旨亦大都相同。張君誠抱悲憫之志。惜不得志於時。而以醫終。雖然。醫能如是。亦何憾於醫哉。

民國乙丑春月同邑嚴鴻基撰

醫學達變自叙

學問非深造至極。不能有神化之境。然神化當由達變而臻。所謂變則化也。經常之道。猶匠人之規矩。舍規矩而成方員。無是理也。但泥規矩而拘方員。非神技也。夫醫亦猶是。不識成法。焉有準繩。拘守成法。何能治變。必也守經通權。由常達變。方爲醫之能事。不然。以一成不變之法。應千變無定之證。難免乎僨事矣。所以先哲有見痰休治痰。見血休治血。汗毋專治汗。熱莫徒攻熱。喘症休耗氣。遺精莫澁洩。明得個中趣。方是醫中傑云云者。詎非有鑒於醫貴達變之道耶。爰將前聖後賢精穎超特之旨。及鄙人心得新發明之處。分別著述。擇尤成帙。名曰醫學達變。俾舉端啟悟。庶不致

故步自封。以一成不變之法。誤千變無定之證耳。往年虛勞要旨之刊。專論內傷。而茲編所闡。特推及外感雜症諸說。醫苟能由是深造。錯綜靈變。穎悟妙用。轉達轉上。極至神矣化矣。此則進乎醫之上乘也矣。

民國十三年甲子春慈谿張國華生甫撰